

阿難。聞拔提釋作是語已。前白佛言。今此拔提釋比丘。宿殖何福。生於豪族。出家未久。獲羅漢果。爾時世尊。告阿難言。汝今諦聽。吾當為汝分別解說。乃往過去無量世時。波羅捺國。有辟支佛。執持應器。而行乞食。時有一人。貧窮飢餓。涉路而行。唯有少餅。規欲自食。見辟支佛。威儀庠序。而行乞食。心懷歡喜。尋即取餅。施辟支佛。受其餅已。踊身虛空。現十八變。東踊西沒。南踊北沒。身出水火。如是種種。作十八變。時施餅人。見是變已。甚懷信敬。發願而去。緣是功德。無量世中。不墮地獄畜生。天上人中。尊榮豪貴。常受快樂。乃至今者。遭值於我。出家得道。佛告阿難。欲知彼時施餅人者。今此拔提釋王比丘是。佛說是緣時。有得須陀洹者。斯陀含者。阿那含者。阿羅漢者。有發辟支佛心者。有發無上菩提心者。爾時諸比丘。聞佛所說。歡喜奉行。

九〇、佛度王子護國出家緣

佛在拘毘羅國吐羅樹下。作是念言。我於今者。當往度彼王子護國。使令出家。作是

念已。將諸比丘。至城門中。足蹈門闔。六種震動。雨諸天花。放大光明。照彼城內。盲者得視。聾者得聽。啞者能言。瘖者能行。時彼王子。睹斯光已。歎未曾有。尋詣佛所。見佛世尊。三十二相。八十種好。光明普曜。如百千日。威儀庠序。甚可愛樂。心懷歡喜。前禮佛足。卻住一面。佛即為其說四諦法。心開意解。得須陀洹果。歸白父王。歎佛功德。若在家者。應作轉輪聖王。典四天下。七寶隨從。遊行自在。尚能捨離。出家入道。況我今者。而不隨從。求佛出家。作是念已。前白王言。唯願大王。慈哀憐愍。聽我出家。隨從世尊。時須提王。聞太子語。遮而不聽。心懷懊惱。斷穀不食。一日。二日。乃至六日。時諸羣臣。見其太子。不食六日。跪白王言。太子今者。斷穀不食。以經六日。恐命不全。願王今者。聽使出家。故得相見。時須提王。聞諸臣語。聽使入道。尋詣佛所。求索出家。佛即告言。善來比丘。鬚髮自落。法服著身。便成沙門。精勤修習。得阿羅漢果。三明六通。具八解脫。諸天世人。所見敬仰。時諸比丘。見是事已。前白佛言。今此王子。護國比丘。宿殖何福。生於王家。出家未久。便獲道果。爾時世尊。告諸比丘。汝等諦聽。吾當為汝分別解說。乃往過去無量世時。波羅捺國王名毘提。興起兵甲。與鄰

國王交陣共戰。時鄰國王為彼所敗。將諸兵眾。逃避退去。到曠野中。值天暑熱。無有水草。飢渴欲死。尋即往彼辟支佛所。便示王水草。渴乏得解。導引其道。還達本國。喜不自勝。而作是言。我等今者。脫此飢渴苦惱之患。皆由蒙彼辟支佛德。今當設供請辟支佛。作是語已。敕設餽膳種種飲食。請辟支佛入宮供養。受其供已。尋般涅槃。時王須提。及諸羣臣。后妃嫔女。號啼涕哭。悲感懊惱。收取舍利。造四寶塔。而供養之。緣是功德。無量世中。不墮地獄畜生餓鬼。天上人中。尊榮豪貴。受天快樂。乃至今者。遭值於我。出家得道。佛告諸比丘。欲知彼時須提王者。由供養辟支佛故。今得值我。出家得道。爾時諸比丘。聞佛所說。歡喜奉行。